

Illoqarfimmi Nuummi katerisimaartarnut allanullu tunngatillugu killilersuigallarnerit inerteqquteqartitsinerillu pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a aamma 12 a, 12 b kiisalu § 29, imm. 2 malillugit aalajangersarneqarpoq:

Atuuffii

§ 1. Nalunaarut illoqarfimmut Nuummut atuuppoq, taamaattoq takuuk imm. 2 aamma 3.

Imm. 2. Nalunaarut Dronning Ingridip Napparsimavissuanut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. §§ 3 aamma 4 katersuunnernut politikikkut allatulluunniit isummersornissamik sunniiniarnissamik siunertalinnut atuutinngillat.

§ 2. Nalunaarut malillugu killilersuinerit, inerteqquteqartitsinerit, peqqusinerit il.il. 30. april 2020 tikillugu atuutissapput.

Katersuunnernut il.il. tunngatillugu killilersuinerit

§ 3. Aaqqissuussanut, nalliuttorsionernut, sammisaqartitsinerit assigisaanulluunniit inuit 10-t qaangerlugit peqataaffigineqartunut ingerlatsinissaq peqataanissarlu inerteqqutaavoq. Inerteqquteqartitsineri ilaatinneqarput illup iluani, silami, pisortat inuillu katerittarnerat, aaqqissuussinerit pisussallu il.il.

Imm. 2. Peqataasut taamaallaat inoqutigiiuppata imm. 1 inissiamut atuutissanngilaq.

§ 4. Inuit qulit sinnerlugit tamanit katersuuffigineqarsinnaasumiippata, § 3, imm. 1-imullu pisup ilanngunneqarsimannginnera aqqutigalugu inuit politiit naliliinerat malillugu nappaatinik ulorianartunik nalinginnaasunik immikkut tunillatsinnissamut ulorianartoqarfiusuni, politiit inuit piffimmiit qimatseqqullugit peqqusisinnaapput.

Imm. 2. Politiit imm. 1 malillugu naliliinerat nappaatinit ulorianartunit nalinginnaasunit

tunillatsissinnaanermut tunngatillugu Nakorsaaneqarfiup innersuussutai nalinginnaasut eqqarsaatigalugit pissaaq.

§ 5. Politiit § 3-mi inerteqquteqartitsinerup eqqortinniarnissaanut nakkutiginninnissaq siunertaralugu ininut sumiiffinnullu allanut eqqartuussivik akuersiseqqaarnagu isersinnaapput.

Imm. 2. Inissiaq imm. 1-imi ilaatinneqanngilaq.

Pisortat suliffeqarfiutaannut isersinnaaneq killilersuinerillu

§ 6. Suliffeqarfiit kulturimik, ilageeqarnermik sunngiffimmillu sammisallit pisortanit pigineqartut Nappaatinut tunillaassortunut inunnut iliuutsit pillugit Inatsisartut peqqussutaanni § 22, imm. 1-imut ilaangitsut iniutitik tamanut mattuteqqassavaat.

Ininut assigiinngitsunut isersinnaaneq killilersuinerlu

§ 7. Inuussutissarsiummik ingerlatallit ininik makkuninnga tamanut mattusseqqassapput:

- 1) Unnukkut klubbit, qitigiartarfiit, imerniartarfiit, il.il.
- 2) Neriniartarfiit, cafeet il.il., tuniniaaffiusumi nerisassanik sassaalliutigineqartunik nerisarfusut, aamma imigassanik sassaalliutigineqartunik imertarfusut, taamaattorli imm. 2 takuuk.
- 4) Sumiiffiit timersornermik ingerlatsiviit sunngiffimmilu sammisassaqaartitsiviit, taakkununga ilanngullugit timersoriartarfiit, nalunnguartarfiit, sungiusariartarfiit, isiginnaartitsisarfiit filmeriartarfillu.
- 5) Kakiuisartut, iverusersuisartut, eqissisimaarluni uffariartarfiit, timigissartarfiit, pinnerasaarfiit tagiartuisarfillu, nujalerisut inillu allanut kiffartuussiviusartut ilusimikkut timimik qanimut attuiffiusartut palersaartarfillu.

Imm. 2. Neriniartarfiit sassaallertarfillu imm. 1, nr. 2, apeqqutaatinagit aamma nerisassanik imeruarsaatinillu tuniniaaffiusumi iioraaffiusussaangitsut (take-away) tuniniaanissaq siunertaralugu tamanut ammatinneqarsinnaapput, taamaattoq takuuk § 9

Nuuk Centerimut isersinnaaneq killilersuinerlu

§ 8. §§ 7-p 9-llu saniatigut Nuuk Centerimut makku atuupput:

- 1) Nuuk Centerimi ammaannartuniinnissaq inerteqqutaavoq. Niuertarfinnut, suliffinnut allanullu iserniartilluni ammaannartut aqqusaarneqarsinnaapput.
- 2) Niuertarfiit allallu Nuuk Centerip isaariaata eqqaaniittut pisisartunik orninneqarsinnaasut periarfissamik matuminnga atuisinnaasut matutik ilorliit matoqqatissavaat.
- 3) Niuertarfiit allallu Nuuk Centerip isaariaata eqqaatigut pisisartunik orninneqarsinnaangitsut immikkut maleruaqqusanik Nakorsaanerup aalajangersagaanik malinnissapput.

Ininut kikkunnilluunniit iserfigineqarsinnaasunut piumasaqaatit

§ 9. Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Natermut kikkunnit tamanit iserfigineqarsinnaasumut 4 m²-iusumut amerlanerpaamik inuup ataasiinnaap isersimanissaa akuerineqarsinnaavoq. Nateq 4 m²-imik mikineruppat oqaaseqatigiit siulliit apeqqutaatinnagit inuup ataatsip isersimanissaa akuerineqarpoq. Nateq oqaaseqatigiinni siullerni pineqartoq qanoq pequteqartiginera apeqqutaatinnagu iikkamiit iikkamut naatsorsorneqassaaq.
- 2) Init ajornanngippat imatut pequsersorsimassapput tuniluunnissaq minnerpaaffianiitinneqassalluni, tassunga ilaalluni pisisut pulaartullu imminnut qanillinninnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit paasissutissanik nivinngaasoqassaaq. Paasissutissat oqaaseqatigiinni siullerni taaneqartut Nakorsaaneqarfimmiit tamanut saqqummiunneqassapput.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq. Innersuussutit oqaaseqatigiinni siullerni taaneqartut Nakorsaaneqarfimmiit tamanut saqqummiunneqassapput.
- 5) Pisisunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aqqateqassapput.

§ 10. Inuussutissarsiummik ingerlatalik politiit naliliinerat malillugu § 9-mik unioqqutitsisimappat, inuussutissarsiummillu ingerlatalik § 9-mik malinninnissaa ilimagineqanngippat, inimik piffissami aalajangersimasumi tamanut matoqqatitsinissaannik politiit peqqusisinnaapput.

Angallanneq

§ 11. Bussit bussimi issiaffiusinnaasut qaangerlugit ilaasoqaqqusaanngillat.

Imm. 2. Angallatit allallu kikkunnut tamanut angallassinissamik neqeroorutillit §§ 3 aamma 4 malillugit ilaasoqarsinnaapput.

Pineqaatissiissutit

§ 12. Inuit § 3, imm. 1-imik imaluunniit §§ 7-9-mik aamma 11-mik unioqqutitsisut imaluunniit § 4, imm. 1 imaluunniit § 10 malillugit peqqusinermik unioqqutitsisut Kalaallit Nunaannut Pinerluttulerinermik Inatsit malillugu pineqaatissinneqarsinnaapput.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq nalunaarummilu allami allanngortitsineq

§ 13. Nalunaarut ulloq 15. april 2020-mi atuutilissaaq,

-

Martha Abelsen

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut